

Cu exposicion den Biblioteca Nacional:

Lady Ruth ta recorda binticinco año den radio-difusion



ORANJESTAD(AAN): -- E disinbein artistico Ruthy Cornelia Vrieswijk-Bergen ta tene riba Diadomingo awor, un atardi especial titula "One face, one smile... Ruthy with sparkles of Uncle Freddy".

Esaki ta tuma lugar na Biblioteca Nacional na Playa y ta pa celebra e di cinco lustro den radio-difusion di Ruthy Vrieswijk, conoci tambe bao su seudonimo "Lady Ruth".

E evento di Diadomingo, Dia Internacional di Hende Muher, ta encera dos ora di poesia, declamacion y canto.

Alavez e ta apertura di un exposicion di fotonan di Frederick Bergen (q.e.p.d.), omo di señora Vrieswijk-Bergen, kende durante su bida tabata un fotografo amateur di gran talento.

Ademas di fotonan di naturaleza y di studio di difunto Freddy Bergen, e exposicion ta consisti di pinturanan cu

artistanan local y internacional a haci di Ruthy.

E exposicion di e foto- y pinturanan lo dura te Diabierna 13 di Maart den sala di recreacion di Biblioteca Nacional.

Publico por bishite diariamente durante e oranan di biblioteca cu ta riba Diamars y Diahuebs te 5'or di atardi y riba Dialuna, Diaranzon y Diabierna te 8'or di anochi.

Den un entrevista cu DIARIO, Ruthy ta bisa cu durante henter siman, e mes lo ta na Biblioteca Nacional pa atende cu e hendenan cu ta bishita su exposicion.

Gustosamente e lo converza tocante e obranan y tambe

encuanto su añanan na radio, especialmente cu hobennan cu ta pensa pa sigui un carera den radio-difusion.

Lady Ruth a traha na radio desde cu e tabata tin dieiseis año di edad y a caba cu MAVO.

Na prome instancia, e tabata kier a sigui bay school den dia pero despues cu e plannan aki a haya otro rumbo, el a cuminsa wak pa un trabao.

Riba un bon dia, el a tende cu Radio Kelkboom tabata busca hende pa traha y a dicidi pa solicita.

El a haci un test di voz y a wordo tuma como operador pa dray disco, pa percura pa propagandanan bay den aire y tambe pa graba propaganda.

Den e entrevista, Ruthy ta bisa cu aunke el a traha na otro radionan despues, su contacto cu Radio Kelkboom a keda existi semper.

Actualmente e ta na Radio Kelkboom atrobe cu su programa "Dushi Awacero Musical", tur Diasabra di 2'or pa 3'or di atardi.

E gusta su programa hopi, cu ta dune chens pa declama poesianan na Papiamentu, Hulandes, Spaño y Ingles, pa entrevista personagenan interesante y pa toca musica cu e stima manera por ehempel, di Neil Diamond.

Tempo e tabata na Radio Galactica tambe e tabata tin un programa parecido na esun cu e tin awor na Kelkboom, cu tabata yama "Dushi Superkick Cosmico".

Ademas di na Galactica y na Radio Kelkboom, Lady Ruth a traha tambe na Canal 90 y na Radio Carina.

E ta corda cu tempo cu e tabata na Canal 90, e tabata e prome cu a cuminsa graba propagandanan cu un parti canta den nan.

Awendia Ruben Garcia tambe ta haci esaki pero pa e epoca cu Ruthy ta papia di dje, propagandanan canta tabata sumamente inovativo.

Pa e evento di Diadomingo awor Ruthy a invita su famia y conocirnan y su amigonan especial manera Padu Lampe (kende tin un cancion dedica na Lady Ruth), Hubert Booi y John y Diet Booi.

Un di e en total diez pintura di Ruthy na Biblioteca Nacional ta di man di Hubert Booi mientras cu tin uno

tambe pinta pa Padu del Caribe.

Riba Diadomingo, e disinbein artistico (locutor, poeta y cantante) lo deleita su publico cu siete poema, algun nobo, otronan di su repertorio bieu.

Como cu ta Dia Internacional di Hende Muher, tur e poemanan lo trata tocante e ser femenino, entre nan titulonnan manera "Muher liber", "Eternamente mama" y "Madushi y su consejo".

Conoci pa su saludo "**Bon dia yen di alegria**", Ruthy ta un persona cu tin su famia y su cas na prome lugar.

Amor y alegria ta lo mas importante den su bida y ta temanan tambe cu ta caracteriza su poemanan.

Ruthy ta splica cu e ta purba semper pa caba su poemanan na un manera positivo y cu un mensahe dirigi na duna otronan forza, hopi biaha e ta skirbi tocante Dios, Su luz y Su amor.

Combinando e celebracion di su di cinco lustro den radio-difusion cu e exposicion di fotonan di difunto Freddy Bergen, Lady Ruth ta cumpli cu un promesa cu el a haci su omo tempo cu esaki tabata riba su cama di malessa.

Cada biaha cu e tabata bay bishita su omo den Hospital, e tabata bise: "Bira bon pa caba pa nos tene un exposicion di bo fotonan".

Den e dianan prome cu el a bay Hospital pa ultimo vez, Freddy a cuminsa piki su fotonan y scoge algun leishi, ningun hende --otro cu Ruthy-- tabata sa di con.

E fotonan aki ta den Biblioteca Nacional awor, pa celebra dos bida, esun di Freddy cu a termina y esun di Ruthy cu ta den pleno flor.

Riba foto hunto cu e articulo, Ruthy Vrieswijk-Bergen.

Telefonnan di
DIARIO

826747

Fax:

828551

